

Segun Tico Croes e forma cu ta atende cu presupuesto ta un indicacion clave

# Gobierno ta mishi cu derecho Fundamental di Parlamento

Maneho di Gobierno ta indica cu Gobierno ta kibra democracia

ORANJESTAD(AAN)-- Algun dia pasa, Ministro di Finanzas a duna un exposicion encuan to e motibonan pa cual e entrega di e Presupuesto 1991 na Staten a sufri tardanza. E Miembro di Parlamento, Tico Croes, a muestra cu atrobe e Ministro ta tira culpa ariba e empleadonan di Gobierno, mientras cu Gobierno mes ta mishi cu derecho fundamental di Parlamento.

Tico Croes a duna di conoce cu ora tuma nota di loke Ministro Guillermo Trinidad a trece dilanti, por nota cu culpa a worde tira ariba empleadonan di e companianan di Gobierno,

DOW, WEB y Aeropuerto. Atrobe Gobierno ta pone culpa den scochi den empleadonan, manera a socede caba ora Gobierno a pone mas di Mil hende na trabao a base politico.

Segun e Miembro di Parlamento a bira costumbre, cu ora Gobierno kier tapa su incompetencia y amateurismo e ta tira culpa ariba ambtenaarnan, cu den pasado tambe mester a carga consecuencia di maneho di Gobierno. Asina na 1985, Gobierno a reduci salario di ambtenaarnan, a kita for di nan tur clase di beneficio manera transportacion,

diferente compensacion y a pone cu ambtenaarnan a bay atras cu 32 porciento den nan entrada.

Banda di esaki mester bay tene cuenta cu dos aspecto importante y mucho mas profundo. Democracia ta midi e relacion entre Gobierno y Parlamento. Na varios ocasion, Gobierno a muestra cu e no ta duna Parlamento e lugar cu ta toke como representacion di Pueblo. E Ministro di Finanzas mes, manera Tico Croes a ilustra, a yega di presenta cifranan incorrecto na Staten, cu no ta ricibi contestacion ariba preguntanan cu e haci na

Gobierno.

Por nota tambe con Gobernantenan ta viaha, sin cu nan ta duna Staten un relato di nan viahe. Kico Ministro Presidente a haci na Jamaica? Kico Ministro Husticia a bay haci Hulanda? Staten mes no sa, mescos cu Staten nunca a worde poni na haltura di viahenan constante cu tur e otro Ministronan ta haci.

Pa loke ta trata e Presupuesto, awor Gobierno ta mishi directamente cu e derecho fundamental di Parlamento, cu ta e derecho di vigila presupuesto, e Budgetrecht, di Parlamento. Ta basa ariba e derecho aki

Parlamento a nace, pero awor ta mishi cu e derecho aki.

Tico Croes a expresa preocupacion enfrente e tendencianan di Gobierno, cu di un banda no ta muestra respet pa Parlamento y di otro banda mester tene cuenta con MEP, e partido mas grandi di coalicion a yega di mishi cu Huez, mientras e forma cu Ministro di Husticia ta atende cu Ministerio Publico, cu ta e esencia di democracia, tambe ta conoci.

Segun Tico Croes tur esaki ta indica cu Gobierno ta hiba un maneho cu ta kibra democracia.